


Die ander meynung/teyl die seyten der fierung. a. b. in sechs gleiche feld/vñ schneyd die cufferen zwey feld auf beden seyten mit zweyen puncten. f. g. ab von dannen/zeuch den inneren breyten zug mit dem spiz zu dem puncten. e. wie vor/vnd von dan zeuch den dünnen zug wider vber sich / also das zwischen f. g. ein ler feld beleib/so leynt sich der bustab weyter auß. Darnach laß die zwey seyten strich den forderen dünnen vnd hinderen breyten oben sten wie vor / aber vnden ruck sie bede in die zwey eck. c. d. Darnach mach die ausschweyffung wie du in dem oberen. m. bericht bist / aber die ausschweyffung vber drit vnden die fierung pey dem. d.

Oder mach das. m. oben von scharpfen ecken / so leinen sich die seyten strich neher zusamen / oder schneyd die strich oben stumpf ab/welichs dir dan am basten gefelt das brauch. Wie du das hernach aufgerissen sihest.



Item das. n. mach in sein fierung/ also zum ersten/zeuch die zwey dünnen aufrechten züg das sie oben vnd vnden die fierung rüren/vnd das ire ausschweyffung an dem forderen zug vnden vnd an dem hinderen oben die eck. c. d. reychen. Darnach zeuch mit einem breyte zug die zwey dünnen züg vber ort zusamen auß dem winckel. a. bis in den puncten. e. damit der dünn zug hinder gemerckt ist/ da laß ein scharpf eck bleyben / aber oben schweyß den breyten zug vor dem eck. a. hinauß eyn fünfteyl von der leng. a. b. dise ausschweyffung soll ein fünfzehñ teyl von der leng. a. b. vnder sich gekrümpft werden. mit zweyerley cirkellinien gemacht/ oben mit einer kleinen / vnden mit einer grösseren/ zu des kleneren cirkeles Diameter/ nym von der leng. a. b. eyn fünfteyl/ vñ setz das centrum auffer halb der fierung/ also das dise das ende der ausschweyffung/ vñ das eck. a. pende reyche. Darnach thü den cirkel ein wenig weyter auf / vnd verruck das centrum bis das die cirkellini rüre das ende der ausschweyffung/ vnd den preyten ortstrich des pustaben mitten zwischen der seyten. a. c. vnd des forderen dünnen zuges.

Oder mach das. n. das sein obre fordre ausschweyffung innerhalb der fierung beleyb / oder mach ein scharpf eck darauß. Wie das hernach ist aufgerissen.